



Aningaasaqarnermut Naligiissitaanermullu
Naalakkersuisoq

Ulloq: 30-08-2022
J.nr.: 01.31.06/22-00990

Aningaasaqarnermut Akileraartarnermullu Ataatsimiititaliap pingasunngornermi ulloq 10. august 2022-mi aalajangiineranik Naalakkersuisunut ilisimatitsineq

Tasiilami erngup nukinganik innaallagissiorfiup allineqarnissaanut atatillugu avataaniit inuiaqatigiit aningaasaqarnerinut kingunerisassanik naliliisitsinissamut aningaasalersuinissaq. Ataatsimiititaliap suliaa nr. 01.31.06/22 – 00990.

”Naalakkersuisut inassutigaat:

- kontomi pingaarnermi 73.01.01 Nunalerineranut, Imminut Pilersornermut, Nukissiutitut Avatangiisinullu Naalakkersuisoqarfik, aningaasaliissutit 2022-mi 0,4 mio. koruuninik amerlineqarnissaat,
- kontomi pingaarnermi 20.11.50 Ingerlatsineranut sillimmatit, aningaasaliissutit 2022-mi 0,4 mio. koruuninik ikilisinneqarnissaat.”

Aningaasaqarnermut Akileraartarnermullu Ataatsimiititaliap oqaaseqaatai apeqqutaalu

Naalakkersuisut inassuteqaataasa tigunerat ataatsimiititaliamit uppersarneqarpoq. Aalajangiinissamut tunngavimmi kukkuneqartoq paasineqarmat 1. juli aalajangiinermini isummernissani ataatsimiititaliap kinguartippaa. Taakku aaqqinneqartut ataatsimiititaliamit oqaatigineqassaaq, taamaattumillu qinnuteqaammik suliarinninneq ataatsimiititaliamit nanginneqarpoq.

Tasiilami erngup nukinganik nukissiorfiup allilernerneqarnissaa piffissami matumani imminut akilersinnaangitsoq isummernissamut tunngavissiami allassimammat ataatsimiititaliamit oqaatigineqassaaq. Nunalli tamalaat akornanni pissutsit arlallit pissutigalugu ikummatissat akii aamma qaffassimapput. Inuiaqatigiit aningaasaqarnerannut sunniutissat misissoqqissaarneqarnissaanni ikummatissat akii ilanngunniarneqarnersut suliamik suliarinninnermut atatillugu ataatsimiititaliamit Naalakkersuisunut apeqqutigineqassaaq.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Akileraartarnermullu Ataatsimiititaliami amerlanerussuteqartunit Siumup Inuit Ataqtigiillu ilaasortaataannit akuerineqarput.

Naalakkersuisut inassuteqaataat Aningaasaqarnermut Akileraartarnermullu Ataatsimiititaliami **ikinnerussuteqartumit Naleqqap ilaasortaataitanit itigartinneqarput** makkulu oqaatigiumaneqarlutik:

“Naleraq isumaqarpoq Tasiilap illoqarfiani ajornartorsiutit naammattumik paasinarsisinneqareersut Tasiilamilu erngup nukinganik nukissiorfiup pilersuisinnaassusia annertusineqarnissaa pisariaqartoq arlaleriarluni erseqqissarneqareerpoq, tassa innaallagissamik naammattumik pilersuisinnaanngimmat ukiullu tamaasa innaallagiarunneq ajornartorsiutaasarpoq, minnerunngitsumik decembarip qaammataani ukiuunerani taarseruttornerani.

Taamaattumillu Naleqqamiit isumaqarpugut innaallagiaruttuarneranik ajornartorsiut sapinngisamik sukkanerpaamik aaqqiivigineqaqqullugu 2023-mi 2024-milu 55 mio. kr.-inik aningaasaliinissaq pisariaqartoq, taamaaliornikkut erngup nukinganik nukissiorfiup pilersuisinnaassusia sapinngisamik piaarnerpaamik annertusineqaqqullugu aammalu inuiaqatigiit aningaasaqarnerannut sunniutissanik aammaarluni misissueqqinnikkut Tasiilami erngup nukinganik innaallagissiorfiup pilersuisinnaassusianik annertusaanissaq kinguarsarneqaqqeqqunagu.

Misissuisoqareerpoq, tassuunakkullu uppernarsarneqarluni erngup nukinganik nukissiorfiup pilersuisinnaassusia 55 mio. kr.-it atorlugit annertusitinneqarsinnaasoq, tamatumalu kinguarteqqinnissaa attanneqarsinnaanngilaq.

Naleqqamit tupigusuutigaarput Tunu aammalumi isorliunerusut pineqartillugit misissuinerit ingerlanneqaqattaarnerat aningaasaliisoqannginneralu, taamaattumillu isumaqarpugut misissueqqinnikkut aammaarluni kinguartitsinermut taarsiullugu Tasiilami ajornartorsiutip annertuup aaqqinnissaanut ilisimasat naammattut.”

Ataatsimiititaliaq sinnerlugu



Hans-Peter Poulsen

Aningaasaqarnermut Akileraartarnermullu Ataatsimiititaliap siulittaasua